

Thursday, January 1, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

NEW YEAR BABIES

Hriat theih chinah kum thara Aizawl a nausen piang hmasa ber chu tukin dar 12 minute 5 khan Civil Hospital, Aizawl-ah a piang.

Civil Hospital Aizawl atanga thu dawn danin Zodinsangi leh Vanlalhlana, Aizawl Khatla veng te fanu kg 3 a rit hi damdawi-inah hian tukin zing dar 12 leh minute nga khan a piang a. Hriat theih chinah Aizawl a nau piang hmasa ber a ni. He naute bakah hian Ngopa khawmi Pi Cindy Lalmalsawmi chuan BN Hospital, Kulikawn-ah zing lan dar 12 leh minute 12 khan nau a nei bawk a. Pi Cindy Lalmalsawmi fa hrin hi mipa a ni ve thung a, kg. 3 leh gram 240 a rit a ni.

Kum hlui, 2025 a India rama nau piang hmasa ber leh Generation Beta an tih mai hun intanna a khaw engrawn hmu hmasa ber chu Frankie Lalremruatdika Zadeng a ni a, Durtlang a Synod Hospital-ah January ni 1, 2025 zing dar 12 leh minute 3 khan a piang a. A nu leh pa hi Aizawl Khatla East veng ami Pi Ramzirmawii leh Pu ZD Remruatsanga te an ni a. He nausen hi a pian hlimin kg 3 leh gram 12 a rit a ni.



HOSPITAL, POLICE REPORT

Nizan kum hlui thlahna leh kum thar lawmna-ah Aizawl-ah harsatna leh buaina lian tham report a awm lo chungin lirthei chesual leh zurui buaina siam an awm nual.

Nizan kum hlui thlah zan atanga vawiin kumthar ni thlenga Akashvani news Aizawl in Aizawl khawpui chhunga damdawiin hrang hrangte atanga report a dawn danin Civil Hospital casualty pantu mi 91 an awm a, heng zingah hian lirthei chesual avanga casualty pan hi mi 15 an awm bakah zu ruih avanga pumna leh intipalh an awm nual bawk. Ebenezer Hospital casualty pawhin pantu an nei nual a, heng zingah hian case pangate chu tlem a serious deuh niin lirthei chesual leh zu kaihhnawih an ni hlawm. Synod Hospital pawhin casualty pantu mi 23 an awm a, heng zingah hian mi 9-te chu admit an ni a, casualty pantu zingah pumna leh pum lam sawisel an tam ber a ni.

Mizorama Police Station hrang hrang atanga report dawn chinah Ni zan khan zu ruia insualbuai vanga man 14 awmin, zu ruih kaihhnawiha man 5 dang an awm bawk a. Aizawl Police Station-ah rukruk thubuai avangin tang mi pahnih, hmeichhia leh mipa an awm a. Bawngkawn Police Station-ah zurui chung a lirthei khalh avanga midang lirthei su chhia mipa pakhat tang awmin, Kulikawn Police Station-ah zu rui khawlai a buaina siam mipa pakhat tang a awm bawk. Zonuam Outpost pawhin rukruk thil a man mipa pakhat leh zu ruih avanga buaina siam, mipa pakhat an kaw

bawk. Heng bakah hian Lawngtlai Police Station chuan rukruk thubuai a rinhlelh mipa pakhat hren mek an nei a ni.



NEW YEAR BABIES

Hriat theih chinah kum thara Aizawl a nausen piang hmasa ber chu tukin dar 12 minute 5 khan Civil Hospital, Aizawl-ah a piang.

Civil Hospital Aizawl atanga thu dawn danin Zodinsangi leh Vanlalhlana, Aizawl Khatla veng te fanu kg 3 a rit hi damdawi-inah hian tukin zing dar 12 leh minute nga khan a piang a. Hriat theih chinah Aizawl a nau piang hmasa ber a ni. He naute bakah hian Ngopa khawmi Pi Cindy Lalmalsawmi chuan BN Hospital, Kulikawn-ah zing lan dar 12 leh minute 12 khan nau a nei bawk a. Pi Cindy Lalmalsawmi fa hrin hi mipa a ni ve thung a, kg. 3 leh gram 240 a rit a ni.



HOMICIDE

Pi K. Vanlalngaii (78) Lunglei chu nizan dar 9 vel khan a chenna-inah thi a hmuh a ni a, tualthi ni a rinhlelh a ni.

Lunglei district SP Pu J. Lalmuankima’n Akashvani Aizawl news a hrilh danin Pi K. Vanlalngaii hi Lunglei Kikawn Bazar Venga amaha khawsa a ni a. A fate’n a ruang an hmuh hnu-ah Police-in tihtur tulte ti-in forensic science lam mithiamte pawhin a ruang leh a behbawm an endik a. Mi kuttuar a thi ni ngei a rinhlelh a ni a, a thih chhan hi a lu-a vuak emaw a lu a tauhna emaw ni a hriat a ni. Amah chauhva awm harsa tak a nih avangin a chenna in pawh hi Anganwadi building hnuai a ni a, local council-in man chawi lova an luahtir a ni a. A ruang hi a fapa-in a chenna in Luangmual-ah la-in post mortem examination tih zawh hnuah vui a ni ang.

Police sawi dan chuan Pi K. Vanlalngaii hi mi thilphalte hunpui pualin tanpuina an pe khawm nual a, cheng sing hnih chuang chu a kawl a rin a ni a. Hei hi laksak tumin an rawk a nih rinhlelhna a lian hle a. Police-in ngawrh takin an chhui zui mek a, he chanchinthar ziah lai hian Police-in rinhlelh man an la nei lo. Amah hi zalenna sual a Mizo National Army (MNA) zawm a a pasal (thi tawh) nena rammu ve tawh a nih thu dawn a ni.

